

# Auto da posta da Mustér a Biasca ed anavos

La stad vegnenta porschan ils survetschs dils autos da posta quater colligiazions directas per di naven da Mustér a Biasca ed anavos. Sco il president dalla Pro Lucmagn, Martin Candinas di, ei quei in survetsch desiderau ed empermettent per la collaboraziun dallas duas regiuns.

HANS HUONDER/FMR

Bunas novas per persunas che vulan serender cul traffic public da Mustér a Biasca, respectivamein da Biasca a Mustér. Sco la Pro Lucmagn ha saviu orientar sias commembras e ses commembers alla radunonza generala il mardi sera a Campra, eis ei reussiu da fixar in urari per la stad vegnenta. Dils 14 da zercladur entochen ils 19 d'october 2025 circuleschan bus directs da Mustér a Biasca e da Biasca a Mustér. Las quater colligiazions ein repartidas sigl entir di. Pil survetsch ein las interpresas dils autos da posta dallas duas regiuns responsablas. Igl'emprems bus parta a Mustér allas 08.03 ed ei allas 09.51 a Biasca.

La davosa caschun da serender da Biasca a Mustér exista allas 16.03 cun arrivada allas 17.51 a Mustér. La gronda part dils ulteriurs cuors dallas duas interpresas mintgama entochen sil pass restan.



## El senn dalla Pro Lucmagn

Il president dalla Pro Lucmagn, *Martin Candinas*, ei satisfatgs dalla soluziun catteda: «Quei ei in pign pass, mo in ella dretga direzziun. Quella porschida promovava il traffic public sul pass ed ei da grond'impurtonza era sco simbol dalla collaboraziun dallas duas regiuns.» Quella porschida hagi la Pro Lucmagn persequitau ditg, era sch'ella seigi da principi buca responsabla pil menaschi dil traffic dil pass durent la stad.



^ La stad vegnenta porschan las interpresas d'auto da posta in urari cun quater colligiazions da Mustér a Biasca ed il cuntrari. En quels quater cuors ston ils passagiers buca midar auto da posta sil hospezi da S. Maria.

FOTO: CC BY 2.0 / WELCOMF TO SWITZERLAND BACKSTAGE!

< Pil president dalla Pro Lucmagn, *Martin Candinas*, savess igl urari dallas colligiazions directas da Mustér a Biasca ed il cuntrari la stad vegnenta era esser in model pigl unviern.

FOTO MAD

La stad vegnenta duei vegnir fatg las emprems experientschas cun quella porschida, vul dir cuagl urari fixau. «Silsuenter vesin us vinavon. Nossa finamira ei aunc adina era in traffic public sur il Lucmagn durent igl unviern. Las experientschas dallas proximas stads vegnan a mussar, tgei pusseivladads ch'ei dess eventualmein era pigl unviern. Igl urari, sco el ei fixaus ussa per la stad vegnenta, sa-

vess era esser in model pigl unviern. Adina denton cun risguard dalla segirtad dalla via.» Igl unviern exista il mument insumma negin survetsch dil traffic public sul Lucmagn. Il survetsch niev per la stad vegnenta vegn exequius dallas duas societads d'auto da posta da Mustér e Biasca sin incarica dils cantuns Grischun e Tessin. Consequentamein ei era la finanziaziun reglada.